



**Senin, 07 Oktober 2021**  
**Ogen: Esekiel 17:1-10**



**Salah Ingan Ernalem**



Lau anak, biasana si jumpai i pinggir-pinggir kerangen, entah i tepi sabah. Maler alu teneng, la mbages launa, sikap ingan anak-anak ridi. I tepi lau anak e biasana turah dukut-dukut entah pe batang kayu. Perbahan urat batang kayu e seh ku lau anak e, la ia melus amin musim perlego. Sabap uratna lalap ngisap lau e ras ipepalerna ku batang, dahan ras bulung batang kayu e. Adi manusia nggeluh i bas ulu kegeluhen e, lalap nge paguh amin pe erbage perbeben si nderpa i bas kegeluhen. Tuhan kap ulu kegeluhen e. Si tetap nggeluh i bas Tuhan lalap nge paguh.

Tapi kecibal bangsa Israel, lanai nggeluh i bas Tuhan. itundalkenna Tuhan. Emaka reh me ukumen i bas Tuhan nari. Ipakena bangsa si mbelin, rajana desken sada Rajawali si galang kal, kabengna mbelang dengen paguh. Raja e eme Nebukatneser Raja Babel. Kabang ia ku deleng Libanon, eme Jerusalem jenari iangkat ku negeri perbinagan e me ku Babel. Jadi Tuhan nuruh bangsa si mbelin lako naluken Israel ras janah ngangkat ia jadi bangsa tawanan. Amin pe Israel e jadi bangsa tawanan, labo idahina Tuhan ulu kegeluhen si banci maba ia ku bas ketenengen. Nilah ia bas Tuhan nari, ipindona penampat man bangsa si deban. Iumpamakan Tuhan ku bas Rajawali si deban, e pe kabengna mbelang janah mbuluna mekapal. Si dimaksudken Tuhan e me raja Mesir si cukup erkuasa paksa si e. Bangsa Israel ndudurken tanna ras nahena man kalak Mesir lako mindo penampat.

Nina Tuhan, banci kin ipediat Nebukatneser bangsa Israel kiam kempak kalak Mesir? Uga kal pe labo pediatna, reh me pasukan i Timur nari e me pasuken tentara Babil ngeripukken kalak Israel ras iangkutna kerina ku Babil. Ibunuhna Raja-raja kalak Israel si la setia man bana. Labo banci Israel selamat adi ia ernalem man manusia.